

IN LIBRUM SEPTIMUM

E P I T O M A.

Phanenses in Venetorum fidem venerunt: Nova religio ad fanum Salvatoris condita est, atque aedes Divo Clementi erecta: Cum Patavinis ad Brentæ fluvii scissionem prospere pugnatum: Veneti in Emanuelis Imperatoris gratiam Normanis bellum intulere: Turris ingens e regione fori erecta est: Plerique Histriæ populi tributarii sunt facti: Crucigerorum aedes erecta: Vicinorum conspiratio aliquandiu rem Venetam sollicitam habuit: Unde ludorum, qui Carnisprivio celebrantur, origo sit orta: Emanuel Imperator uno tempore negociatores Venetos tota Græcia oppressit: Validissima classis in Emanuele instructa: Justiniana domus hostium fraude pene tota absumpta est: Vitalis Princeps ex Græcanica expeditione reversus, a suis cæsus est: Artifex Gallici sanguinis geminas ante forum columnas mira arte erexit: Rivumaltum primus ponte junxit: Emanuel Venetorum legatorum alterum violavit: Quam ob causam Emanuel Venetum nomen oderit: Quando primum pecuniæ a privatis sint mutui nomine in publicum collatæ: Alexander Pontifex dissimulata persona Venetias confugit: Veneti Pontificis causa arma in Federicum Barbarubram susceperunt: Federici filius a Venetis navali prælio victus Venetias captivus est perductus: Alexander Ducariam majestatem amplissimis ornavit insignibus: Federicus Alexandro Venetiis reconciliatus est: Venerus Dux Pontificem Romam secutus, magnis ab eo muneribus donatus, domum rediit: Auræ ædis ultimo loco continetur explicatio.